

丹
淵
集

三

丹
淵
集

丹
淵
集

PDG

陳眉公先生訂正丹淵集卷七

宋 蜀 文 同 與 可 撰

明 吳 毛 晉 子 晉

蜀 李 應 魁 務 滋 同 叅

吳 吳 一 標 建 先

詩四十首

新秋讀書

高風發遠籟轉響爲清商
隆曦減炎威未晚先
自涼庭前碧桐樹
昨日聞早霜朝來逐葉上已

暈一拂黃壯歲覺時節燿若翻電光自顧勿嗟
惋徒然攬中腸官居幸少事署案日幾行公退
清且閑垂簾坐虛堂解帶輒傲兀左右羅縑紉
所務唯討論一燈從夜長

貧士行

側身入窮閭跼影守環堵日高齒未嚼風勁骨
猶露胡爲迫凍餓此道吾所素出每駕雞棲歸
仍伏龍具原生本非病董子蓋不遇誰將斗升
水活此轍中鮒不見裹糧人欲死者亦屢徒自

諷詩書區區立名譽

馮氏道中早行

畏暑事晨役高原動征羈
遙遙歷廣博浩浩長
風吹踈星才出沒河漢西南垂
林端啓明上飛
光發丹曦熒熒洒晴露百物含華滋
爽氣入肝
鬲宿濁無一絲寒泉漱清甘洗滌俗慮遺
還憂
火輪怒萬里燒雲遠

宿李同年蔭碧亭

時自長安慮因屬疾

抱病出煩闌投此青林間
高軒得清涼坐致精

爽還主人止之宿借與終南山中宵皓月起繞
枕皆孱顏望久氣自清心甯無結頑平明又西
走勝軌不可攀

李生畫鶴

昂昂青田姿杳杳在輕素一身萬里意雙目九
霄顧彭彭羽翮利竦竦骨節露君初本誰學我
恐必神悟得於想像外看在絕筆處稷筮如復
生相與較獨步

幽州

昔年戎馬盡南幽今日風光已太文雅吹夜喧
金府月靚粧春艷玉峯雲泉亭柳色濃將滴水
寨荷香遠更薰邏候不驚烽燧息高原閑獵舊
將軍

寄友人

惟秦抵於蜀間可歷萬嶽遙懷嚮英義潛想一
夕馳乏人探道與求合常苦奇音見謂可招納
欲與相塌麈夫何屢乖絕出處各一涯秋風動
孤況西首勞所思

和仲蒙夜坐

宿鳥驚飛斷鴈號，獨凭幽几靜塵勞。
風鳴北戶霜威重，雲壓南山雪意高。
少睡始知茶効力，大寒須遣酒爭豪。
硯冰已合燈花老，猶對群書擁敝袍。

明教院

野逕欹危入谷斜，曲崗回嶺共交加。
經年不到爲隔水，此日獨遊因看花。
兩岸烟雲閑景物，一軒泉石靜生涯。
自怜冠珮嬰身者，直入樊籠老

歲華

和仲蒙夏日卽事

簿領初休几按清西軒移枕臥前楹香從菌苔
紅苞發粉入簣管翠節生不分去聲便衰聞蟻鬪
可嗟俱妄見蝸爭日長景靜官曹冷莫厭頻來
對一枰

西軒秋日

官舍蕭然似隱居一軒秋色伴恬如深藏宿雨
樹木暗高灑夕陽籬落踈景物靜思臨水石光

陰閑覺入圖書此心只有雲相信長畔吟魂遶
太虛

和張屯田秋晚靈峯東閣閑望

直欄橫絕紫微陰凭久秋光照客襟一道山川
寒色遠萬家烟火夕陽深涇灘水落群鷗集秦
嶺雲高斷鴈沉此興浩然須把酒可伶難醉異
鄉心

春庭

春院陰陰翠靄亙春庭寂寂曉光迷花間蜂去

抱黃粉苔上鷺來銜綠泥兩行高梧初蔭合一
番新草恰生齊微禽已識幽人意飛下欄干向
裏啼

過永壽縣

驅馬上危坂暮鞭搖客愁峯巒驚滿目咫尺擬
回頭紅樹擁野店白雲藏縣樓須知此北下地
底見幽州

杜老有幽州
入地底之句

東谷偶成

府事幸稀簡常爲東谷遊舊山茲髮髯佳景每

遲留斷續溪雲起縱橫野水流拂衣知未得聊
此慰鄉愁

宜祿昭仁寺後軒

危欄憑絕壑欲奈此時何但有夕陽處就中秋
色多與誰同徙倚空自發吟哦便覺成羈旅歸
心逐鴈過

過高堦城

顏壁乍高低中間已亂蹊長原想鵝鶴大塚記
鯨鯢黯澹寒雲結蕭疎野草齊興亡盡遺迹立

馬看扶犁

夏日翠漪堂

湖水碧溶溶寒漪四望通
龜魚遊浩渺鳧鷖下
虛空爽氣吟窻外清光釣艇中
一襟時自快多謝北軒風

玉峯園經春不得一過因成詩呈同官
約遊

春來少嬉遊俗事日相耗
南園只城外累月不一到
花香雨後歇樹色風中老
惟有崑下泉猶

能滌幽抱

送張兢無悔秘校赴調

無悔富道誼卷藏無所施端笏拜上官十年走
堦墀人皆爲嗟惋君獨安且怡又執考書去當
衡誰與知

六月十日中伏玉峯園避暑值雨

南園避中伏意適晚忘歸墻外谷雲起簷前山
雨飛興餘思秉燭坐久欲添衣爲愛東崑下泉
聲通翠微

咸陽道上晚晴有作

積霽晚盡散南山明夕陽秋容徧豐鎬古恨入
隋唐草木咸搖落風烟自渺茫客亭須下馬把
酒慰殊鄉

歲晚登清素院北閣

雲端訪古寺樹杪臨危閣風厲懾草木霜乾喜
鵬鷲天時旣悽慘人意亦寂寞回念故山遠心
隨日西落

炭泉險道

一澗呀然截亂峯更於何處問途窮高深出井
又入井曲直上弓還下弓絕底乍臨渾偏仄危
顛纔徹似飛冲我來行縣須經此正在炎炎三
伏中

玉峯園避暑

伏日當飲酒南城會群賢開樽蔭碧樹移席臨
清泉浩意脫塵土高懷軼雲烟早歸休信俗須
待月娟娟

早起覽物成詠

移枕出幽幌披衣步前楹秋容草木靜曉氣烟
雲輕蟬噪宿露滴鴈飛朝霞明塵心幸未動聊
此納餘清

寄馮永州

山水永最善守居聞更優烟雲萬石古風月九
岩秋几案少俗事壺觴多雅遊無因陪後乘幽
意滿湘流

暑夕待月庭下夜深方歸

晝蠅方少夜蚊多推脫霜紈奈熱何獨向中庭

待明月一身清露瀉金波

中伏日諸君會玉峯余以病不預作詩

寄呈

去年中伏在南園同聽清泉引綠樽今日諸君
又高會獨嗟移疾臥西軒

興平原上赤熱因寄永壽同年

日午終南翠色燃滿襟飛土下秦川是時獨想
君高尚正在山亭弄野泉

蘇林出亭口對水走南澗林容草木精神

林下翩翩鴈影斜
滿川紅葉映人家
岩頭孤寺見橫閣
有客獨來登暮霞

淺水原

鶉觚西北地鱗鱗
此處當年起戰塵
見說如今溝壑下
斷鋒殘鏃屬耕民

興平原上

東西車馬走秦川
擾擾飛塵混曉烟
我亦中間遊宦者
尚慚無語賦歸田

西湖荷花

陝西省教師進修學院

圖書館藏書章

紅苞綠葉共低昂
滿眼寒波映碧光
應是西風拘管得
是人須與一襟香

石龍渦

嶮勢圍空斷壁圓
四時常見聚雲烟
爲霖救旱今何在
徒有遺文記昔年

有李懷又記備述
禱雨有驗之事

水洪

紅芳霄露清翠節
曉霜犯雨後
曬殘日秋容滿
庭楹

黃蜀葵

錦江何日別
漆水今朝見
清露染顏色
秋鵝一
分淺

鼓子

干菜者

柔條長百尺
秀萼包干菜
不惜作高架
爲君相
引接

鄆上懷古

未曉南山去
從禽夜不歸
凡行多少地
十二所
更衣

石竹

蜂齧紅葉爛蟲啼碧叢短秋風畧地起惟有蒼苔管

丹淵集卷七終

陳眉公先生訂正丹淵集卷八

宋 蜀 文 同與可 撰

明 吳 毛 晉子晉

蜀 李應魁 務滋同叅

吳 吳一標 建先

詩五十一首

邛州東園晚興

公休時得岸輕紗
門外誰知吏隱家
聞鳴整群
翻荇菜乳鳥無數墮
松花携琴秀野彈
流水設

席芳洲詠落霞向晚雙親共諸子相將來此樂

無涯

秀野芳洲
二亭名

雨過側調

陰車飛空載急雨雨過林塘若新換
檉花浮波魚誤食松子落屋烏驚彈
白雲挂樹久不起青煙泊草殊未散
東園傲吏愛高竹把卷倚風頭
髮亂

題象耳山寺

轉谷縈巖路始窮隔林遙望一門通
溪山俱在

見聞外臺殿盡藏懷抱中像閣呆愚明海日經
幢瓔珞撼天風勞生又逐輕舸去珍重高僧解
苦空

題晉原舒太博清谿閣

危閣飛空羽翼開下蟠波面影徘徊光搖畫板
月深淺聲遠曲欄風往來暝色四郊煙莽蒼曉
雲千嶂雪崔嵬主人好事民無訟日夕登遊對
酒杯

縣樓獨酌

向晚無公事身如太古閑
縣樓明夕照罇酒對南山
放意利名外遊心天地間
生來不能飲到此學醜顏

殘秋郊外

蕭蕭風色弄寒威見盡郊原向晚暉
昨夜星霜和月落滿林紅葉隔煙飛
已嗟北渚蓮初老更惜東籬菊漸稀
休感歲華傷節物眼前罇酒重相違

郊外

城市駭塵土高原聊振衣晚雲多淺碧秋樹半
深緋江氣雜輕靄山光明落暉因成求好景更
就野橋歸

靜林詩僧已老

七十吟中老清風滿舊林倚筇秋岸遠圍衲夜
房深未得雲空在將成月已沉生平苦如此誰
是識師心

高堂山堯率寺

孤絕不可狀此山餘舊聞因官多暇日與客到

深雲門外一塵斷座中千里分勞生當自去繚
繞下西曛

閑居院上方晚景

繞岩縈谷到禪扃更上危巔最上亭風攪亂鷗
盤古木雨催羣鷺下寒汀秋田溝壟如碁局晚
岫峰巒若畫屏詩已就成終夕去遠村燈火一
星星

李道士惠琴軒集

二首

驅役精魂入大幽滿編奇絕盡冥搜不教天地

畧容隱應與鬼神同訪求海藏光芒開寶三羽
林鋒刃立戈矛蕭臺自好携歸去莫向人間苦
暗投

其二

壽寧孫老畫壁下當日偶同君此行是時衆裏
畧一揖自爾乃得君詩名風馳雨絕十五載此
地忽爾相逢迎見投琴軒兩大集寶匣金鑰緘
瑤瓊未開試使道所有毛髮寒豎肝膽驚歸來
燒燈讀至曉句險字硬才力瘁君身長不滿三

尺萬象何術獨手擎嗟我氣俗音韻淺不敢與
君相和去鳴聊書短歌報佳惠它日願將朝七
瓊

彭山縣居

公館靜寥寥園亭景物饒溪光明短釣樹影蔭
危譙山鳥忽雙下池魚時一跳主人王事簡文
酒日逍遙

下金雞山

峽東幾重煙山分數尺天岩猿與溪鳥一似過

飛仙

過金雞關

關頭氣象古關下風煙淡春深草木活嵐重坑
谷暗禽聲着部奏花色成窠勘歸鞍雖若水留
此亦能暫

夜靜獨登小閣有所見因書

危閣橫空蔽野扉夜深來上久忘歸水光瀲灩
和煙動雲色襜褕夾月飛隔岸葦村聞笛遠背
灣松塢見燈微此間自得吟中樂不覺霜華滿

盡衣

送黃夢得

去年輕舳過巫山今日羸驂度劍關
孤客每嗟隨斷梗慈親常把夢連環
蘭陔歲晚雖堪采桂窟春深正好攀
決取榮科歸舊里板輿迎侍且承顏

送郭方叔南充簿

六月東山道炎風滿去鞍
譙周之舊里仇覽此初官
簿領無煩壅圖書好燕安
清朝名路闊慎

勿學長歎

送張郭二秀才赴舉

二子共齋刀翩翩去意豪
負才皆萬選入守定
雙高上道梅薰袖還家草映袍
須知本鴻鵠終不在蓬蒿

謝人寄蒙頂新茶

蜀土茶稱盛蒙山味獨珍
靈根託高頂勝地發
先春幾樹初驚暖羣籃競摘新
蒼條尋暗粒紫萼落輕鱗
的皜香瓊碎鬢髮綠蠶勻
慢烘防熾

炭重碾敵輕塵無錫泉來蜀乾峭蓋自秦十分
調雪粉一啜嚙雲津沃睡迷無鬼清吟健有神
冰霜疑入骨羽翼要騰身磊磊真賢宰堂堂作
主人玉川喉吻澁莫惜寄來頻

謝許判官惠茶圖茶詩

成圖畫茶器滿幅寫茶詩會說工全妙深諳句
特奇盡將爲遠贈留與作閑資便覺新來癖渾
如陸季疵

雨後看山因憶黃世南先生詩以相招

新霜夜落羣梢鳴羣風刮天爲早晴南山向曉
盡張列頽嶺斷壑當空橫開軒一見喜無量走
上高閣臨飛甍層欄倚遍不能下狀貌秀活圍
雙睛奔騰遠近若波浪愛極擬去中間行此時
只恨少佳客相共叫笑誇崢嶸我思黃子者奇
士趣向超越無俗情手提詩筆若椽大到處詠
物物有名我今此縣頗幽僻復在歲杪天氣清
溪中魚蟹易尋覓林下梨栗新收盛子如訪我
住旬浹此品可備盤與觥遂馳僕馬去邀子願

子爲我聊出城私心不獨徒見子亦願播此山之聲子如不見不爲誅可惜此山虛此生

送楊議卿赴舉

寒日照殘樹新霜結衰草有客奉高薦策馬奔
遠道聲名近轉大文字素已好壯歲雖可恃榮
科亦宜早勉自報春暉高堂親髮老

和楊仲軻春難度

三首

春難度紅梢梢尋縷縷朝披煙暮結雨勸君飲
酒莫用訴春難度

其二

春難度歌滿闋酒萬舉喉欲破腸欲腐風光滿
天已不暮春難度

其三

春難度池浮花墻擁絮枕書睡樹陰午日長幾
何萬尺許春難度

和何靖山人海棠

爲愛香苞照地紅倚欄終日對芳叢夜深忽憶
高枝好把酒更來明月中

訪李奐山人隱居

多暇無所適故來尋隱君
塞開墜屋樹觸散擁
門雲狀貌不妨古言談何太文
令人重高趣歸
去每斜曛

冬晚書事

倚杖立亭臯寒威向曉豪
雪乾山色老風烈樹
聲高殘日千鷗舞孤雲一鴈號
自然成感物不
覺首重搔

晚次江上

宛轉下江岸霜風繞人衣翩翩渚鴻墮冉冉林
鴟歸前壑已重靄遠峯猶落暉孤舟欲何處劃
浪去如飛

十月梅花

十月凍墻隈英英見早梅應從九地底先領一
陽來紫膜紛紛脫黃膚迤迤開得風渾自變與
雪欲成堆細暈輕檀口濃粧膩粉腮月娥身解
寫青女手能裁冷豔浮冰沼清香落玉杯只憂
融乳酪不惜露瓊瑰避妬情堪重禁寒術可猜

有誰憐寂寞盡日獨徘徊共語誠無計將題耻
不才東隣夜夜客莫放笛聲哀

吉祥院

欹危一逕通下馬轉深叢便是塵寰外可憐煙
塢中修篁寒滴雨老栢靜吟風日暮庭前樹歸
鷗自遶空

書鶴鳴化壁

晚氣陰陰別作寒夕陽林下動歸鞍忽然人報
後山雪更上上清宮上看

題鶴鳴化上清宮

秘宇壓孱顏飛梯上屈盤清流抱山合喬樹來
雲寒地古芝英折岩秋石乳乾飈輪遊底處空
自立層壇

寄題何靖山人隱居

門外鋪寒水牆頭立好山先生忘勢利高隱寄
中間鳧鷖應同樂煙雲已共閑幾時能少暇携
酒到松關

寄楞嚴大師

錦官城裏寺一室若雲峯水縮秋吟鼎霜低夜
講松住齋塵入鉢出定蘚生筇曾聽三摩義居
常夢曉鐘

揖山閣

一問此孤高蒼蒼欲上摩有時臨縹緲盡日對
嵯峨絕底秋陰重危層晚照多無由從隱者空
自愧雲蘿

杳杳堂

杳杳堂何者余常此養愚放身依曲几忘慮若

枯株莊老題書冊
喬松列畫圖
客來休見問
非爾識于于

安仁道中早行

行馬江頭未曉時
好風無限滿輕衣
寒蟬噪月成番起
野鴨驚沙作隊飛
揭酒旗當岸立
翩
翩魚艇隔灣歸
此間物象皆新得
須信詩情不可違

竹閣

回廡抱曾閣
蕭然深且虛
畫欄憑曲曲
高竹愛

踈踈塵滓外不到衣襟清有餘每來聊自適幽
意滿琴書

尋春

馬行如疾輪十里去尋春盎盎日光麗鮮鮮雲
色新樓臺出花木道路夾松筠欲買前村酒陶
然作醉人

太博孫公遊火井因寄

七盤雲道與雲浮下見高林壓縣樓覽景莫能
陪後乘臨風空自憶前遊已聞去日謀詩席更

羨歸時就釣舟好句定知酬不得盡將奇詭入
冥搜

墅居

林下覽清曠此懷殊不羈散行輕幘便獨酌小
甌宜自可追三樂何須作五噫世情歌笑外紛
擾竟何為

面川亭

幽亭最孤絕直入亂叢間近晚獨來此有誰相
與閑卷簾通大野臨檻數前山便欲教携酒陶

然踏月還

南亭

晚衙初散吏人歸
獨立南亭着道衣
淺酒小詩聊自樂
此心渾欲外輕肥

北郭

繞樹垂蘿蔭曲堤
暖煙深處亂禽啼
何人來此共携酒
可惜拒霜花一谿

讀史

不得熒陽遂失秦
始知成敗盡由人
可憐一擲

羸天下只使黃金四萬斤

夜學

已叨名第雖堪放未到根原豈敢休文字一牀
燈一盞只應前世是深讐

畫眉禽

盡日閑窓生好風一聲初聽下高籠公庭事簡
人皆散如在千器萬壑中

鷺

濃染羽毛深畫眉曉來風日正晴時只應自道

新聲好啼遍後園花萬枝

佛頭

地名也此中山水絕佳

公暇常來此處遊碧波蒼巘解相留翩然又向
城中去回顧溪山只自羞

丹淵集卷八終

陳眉公先生訂正丹淵集卷九

宋 蜀 文 同與可撰

明 吳 毛 晉子晉

蜀 李應魁務滋同叅

吳 吳一標建先

詩三十五首

和子平弔猿

去年汶山花平僧求得匡猿遠相寄來時野性
已馴熟趨捷輕便殊可喜呼來遣去會人語一

成已絕歸山意置之眼前看不足解去條索令
自恣月明木杪倚風嘯天暖花陰向陽睡兒童
圍繞賓客惜倒挂橫跳街嬉戲豢夫每日費提
舉未始時節虧飲飼前時忽來報之病抱立堦
前自臨視與之柿栗不肯顧局脚埋頭交兩臂
毛焦色暗肉攣縮斗覺精神變憔悴尋常忽然
遇小疾不過蜘蛛噉三四咽喉才下卽無恙何
此不効况頻餌今朝霜風冷入骨早遣之問云
已斃人情不免爲傷怛退自悔恨中且愧重巒

複袖本其樂大薄長林違爾志苦將韉鎖強維
摯不究天年良有自遣人包裹瘞深僻不使筋
骸屬螻蟻西隣子平最好事聞之搏髀歎無已
再三慘怛來訪問歸作長篇踰百字其詞讀之
甚悽愴亦謂一鬱歎其死復推物理重相慰聚
有散無皆偶爾把之庭下讀復讀仰望高株一
歎歎

和子平悼馬

生來未嘗畜良馬近得此駒誠可嘉骨節權奇

毛肉好此種無乃真渥洼健蹄駸駸穩而疾歷
目一過如飛霞自歸官下少出入惟是芻粟意
轉加前時相期好天色往返百里馳平沙誰謂
兵奴蹠其足針烙熨裏成癩痂立多氣毒憤入
肺雙廉攢縮兩鼻呀庸工謬藥久不効倒死櫪
下鬃髻髮敝惟一區瘞以贈惜爾命薄如菱花
子平平時最愛爾對客滿坐常洪誇今朝見爾
忽斃踣重以好詩形歎嗟嗟余逐貧官職小此
馬豈合居余家從今但只跨款段壞轡破鞍仍

短檝

冷餅

海南有陶器質狀矮而脣云初日炙就鍛鑠不以火水壺醜突兀酒甕肥磔砢山壘頸微腫石鼎足已跛圓如鴟夷形大比康瓠顆華元腹且皤王莽口何哆蕃胡入中國萬里隨大舸携之五羊市巾匱費包裹侏離講其効瀉辯若炙輠課以沸泉沃冰雪變立可炙敲療中渴其用豈么麼君凡幾錢得不惜持遺我會將對佳客屢

試輒亦果勿云遠且陋幸可置之左

中秋夜試院寄子平

憶初我來時夜色如墨障心常念明月幾日西
南上松梢倚樓角一袂偃相向漸見輪中物依
稀吐形狀今宵東嶺外灑灑金波漲人間重此
夕一歲號佳賞而我督秋試鑠宿密如藏細務
紛滿前約束甚鞮鞻無由奉朋侶徹曉坐清曠
之人富才華筆力趨且壯誰陪把罇酒露下與
酬唱南墻咫尺地使我起遐想人生此良會可

惜已虛放獨立中夜歸俛首入書幌

贈城南觀音院菴主廣師

簿領日嬰薄紛然汨幽襟駕言出城南聊欲清
此心平岡見淨刹石逕鬱以深中有苦空人峭
健奇骨森十年一菴下形迹了莫尋兀如擁敗
褐口吐衆妙音時下寂照堂聲絕響亦沈默矣
蓋自得其誰知少林

送韓震都官監渭州酒韓近悼亡

士師每失官未始有憂愠園吏旣喪婦何嘗復

嗟憤二子道義勝一與天理順之人乃其徒心
迹兩相近區區赴窮塞而使賣官醞胷中浩然
者俗口不得問好軍此開府遇士以恩信若訪
禦戎策請爲講三陣

時仲儀帥渭

成都楊氏江亭

汀州煙雨卷輕霏遙望軒窓隱翠圍萬嶺西來
供曉色一江南下載晴暉鳧鷖慣入闌干宿魚
蟹長隨舴艋歸我亦舊多滄海思幾時如此得
苔磯

漢州王氏林亭

短笻疎籬入野局竹烟松露滿襟清奔湍激險
飛寒響弱蔓穿深挂晚英惜去更觀曾畫壁記
來重注舊題名門前便是紅塵道誰肯同過洗
俗纓

春雪呈知府龍圖

朧朧玉魄沉霄彩款款瑤花破曉陰和氣所蒸
緣異政豐年之兆慰羣心畫樓卷白歡聲洽遊
騎障泥樂意深太守安閑民訟息錦城無限好

園林

同蘇秘丞子平登延暉故亭

城端有亭餘故基吏曰舊榜題延暉行穿蒙籠
倚孤俾霜風飄蕭吹我衣高林滿郊目四圍雲
起日落晴烟飛感今念往聊久之埤垠昏黑羣
鷗歸

金桃

雨染烟蒸萬寶垂丹殊爲骨菊爲衣客疑麗水
新淘得人向瑤池舊帶歸只恐壓枝星欲落最

怜和菜露初晞銀瓜玉李君休並此品仙家亦
自稀

房公湖

一頃清波四面平宛然唐相舊經營高秋林木
形容老落日樓臺綵繪明有景可尋蘭櫂遠無
幽不入竹橋橫二年所得官居樂肯厭頻來緩
帶行

錦雞

高原濯濯弄春暉金碧冠纓綵繪衣石溜瀉煙

晴自照巖枝橫月夜相依有時敦宰盤跚舞忽
地鈎輶格磔飛寄語人間用繒繳瑤臺鸞鳳好
同歸

竹樓

秀榦扶疎綵檻新琅玕一束淨無塵重苞吐實
黃金穗密葉圍條碧玉輪凌犯雪霜持勁節遮
藏烟雨長輕筠此名未入華林記誰念西南寂
寞春

無爲山寺

一組危磴遶崢嶸上徹幽深入化城烟外川原
誰繡畫雲中樓閣自陰晴老僧高論都無著古
佛真身宛若生聞道軍持新呪水願傾涓滴洒
塵纓

劍州東園

羣峰高擁碧嶙峋亭宇清華氣象新兩岸烟雲
先向日一林花木暗藏春溪明夜閣軒窓月風
斷晴橋井邑塵好酒蒲樽詩滿軸主人曾不倦

行人

運判南園瞻民閣

青都高與紫霄通，獨此危欄望不窮。
萬嶺過雲秋色裏，一峰擎雪夕陽中。
欄楹曉落天蒼月，窓戶晴吹石闕風。
民吏安閑財賦足，管絃時復在層空。

讀淵明集

吏人已散門闌靜，公事才休耳目清。
窓下好風無俗客，案頭遺集有先生。
文章簡要惟華袞，滋味醇醲是太羹。
也待將身學歸去，聖時爭奈正

升平

張次公大博歸閩中

制詔頻來試玉京清途猶自滯豪英策高三道
竟何用恩拜二親方爾榮私阮襟懷終曠達儀
秦才術本縱橫閩中勝事知無限且向城南爛
熳行

寄成都監庫石屯田遠叔

一年同住夾城中小圃高齋幸見容吟盡物題
春唱和講窮人事夜過從尋芳待去門前約訪

古邀回道上逢別後西樓不堪倚滿川林木暮
雲重

宿隆平精舍

萬木羅青蓋雙峰敞翠屏風埃愁客路鐘鼓喜
禪肩下馬穿蒙密隨僧入杳冥俗襟如見濯試
爲瀉銅餅

弭蓋亭

弭蓋長亭下軒窓慰客心田勝交遠日水壩瀉
清襟北道雲千里西山雪萬尋塵衣無奈拂去

騎復駿駿

什邡道中

驅馬下遙川，殘陽促晚鞭。
高林夾廣道，亂水入平田。
村落晴如畫，桑林晝起烟。
飛鴻正南下，歸意滿雲邊。

夜思寄蘇子平秘丞

亂竹敲風遠，高松過雨涼。
檢書防落燼，下幕恐遺香。
好月娟娟上，輕雲冉冉長。
端令阻佳客，不得共清觴。

西湖

丞相淹回地光容滿落暉池塘存舊夢城郭歎
前非煙靄陰晴出鳧鷖遠近歸松風殊有意猶
欲下金徽

猿

岷嶺高無敵來從第幾層攀緣殊不倦趨捷爾
誠能晚嘯思危石晴懸憶古藤王孫非汝類只
可以文憎

幽沼

促促開幽沼涓涓引細渠無由安島嶼才可活
龜魚秀荇新宜食圓荷淨好書時來坐高柳濯
足蔭扶疎

步月

掩卷下中庭月色浩如水秋氣涼滿襟松陰密
鋪地百蟲催夜去一鴈領寒起靜念忘世紛誰
同此佳味

中秋對月懷寄鳳凰山鄧道人

有客千巖萬壑中綠毛丹臉紫方瞳不知今夜

西樓月幾處飛山下碧空

秋日晚晴呈同院

秋風淅淅吹碧虛白雲鱗鱗如臥魚共君今夜
賞明月興來誰欲騎蟾蜍

戲呈鳳凰長老用師

七十頭陀會語言舌根流利口闌珊羅浮居士
最難奈穩把無絃琴與彈

郡學鎖宿

長栢高栴蔭廣庭夜涼人靜夢魂清不知山月

幾時落每到曉鐘聞雨聲

子平棊負茶墨小章督之

睡憶建茶斟漱灑盡思充墨潑淋漓可憐二物
俱無有記得南堂棊勝時

長安李晦叔醉老菴

醉老名菴晦叔爲菴中長是醉淋漓扶頭未得
日過午門外萬端俱不知

和邵興宗棊聲

二客與棊酬寒聲滿側楸急因隨行發斷爲見

遲休花下鶯翻翼
林間鶴轉頭
丁丁竹樓下
不獨在黃州

丹淵集卷九終

陳眉公先生訂正丹淵集卷十

宋 蜀 文 同與可 撰

明 吳 毛 晉子晉

蜀 李應魁 務滋同叅

吳 吳一標 建先

詩二十三首

續青城山四詠

昭慶觀

琳崖盤玉霄彩翠接步武雲霞不可盡泉石固

難譜神幢逾百尋帝轍歷萬古靈瀑誰與窮長
飛六時雨

天倉山威儀觀

群峯削瓊瑤老蘚抹古綠應朝大嶠去簪笏儼
相逐珠宮秘仙仗錦笈藏寶錄上帝此爲倉其
田堪種玉

飛赴寺

平林露層巘上獨置孤寺群仙馭飛駕往往赴
於此風高幡影亂日落鐘聲起誰可謂詩豪興

來吟萬紙

香積寺

道險轉詰曲山深愈巔峿行松耳目清入竹襟
袖寒殿閣紅芙蓉崑巒碧琅玕高僧把金字擁
衲對雲看

夏秀才江居五題

枕流亭

愛此煙景佳開軒故臨水晴暉照寒浪飛影動
牕紙倚檻見魚游卷簾知鴈起憔悴笑湘纍區

區詠蘭芷

闢碧亭

雨餘山景鮮風定水光好晴陽破宿霧秀色濃
可掃平時一樽酒野客共傾倒朝暮山水間年
華不知老

天隱洞

層崖削青瑤誰昔此鑄鏤潭潭闢孤洞中可百
人受噴吼列岫繞洶湧大江漱虞卿方著書入
此幾年就

直釣磯

盡知人釣曲獨見君釣直年年此磯上萬掣無
一得持竿只自苦吞餌何嘗識試効人所爲君
魚不勝食

醉經庵

垂茅緝爲庵有類穹廬形之人伏其中日醉乎
群經世俗安爾知但謂長不醒寄此語二豪渠
非彼劉伶

寄題杭州通判胡學士官居詩四首

鳳味堂太史書言官居在鳳凰山下此
山真如鳳有兩翅翅上各建一塔而鳳
背正落所居池上舊有一堂在山欲落

處近葺之謂之鳳味堂因而求詩

四詩
爲子

瞻賦今易以胡侯豈黨
祠未解故竄易失真歟

胡侯外補來錢塘所居之山名鳳凰不知元本
發何處虵頸魚尾盤高岡婆娑欲下大江飲萬
里一息頭低昂誰將屠蘇墜兩翅直使帖地不
得翔前人眼俗不知顧會有賢者來形相怜汝

困欲共汝語故近汝味營斯堂起居飲食不離
上外孰有耳聽琅琅應云汝德未衰在日暮可
起鳴朝陽

濺玉齋又言山上草中多恠石近取得
百餘株於東齋累一山激水其間謂之
濺玉齋

石林

森座隅激水注射成飛渠寒音琤然

落環珮爽氣颯爾生庭除主人清標自可敵底

處勝槩爲能如想君不欲時暫去其餘滿案堆

文書

方庵又言堂後有屋正方謂之方庵同
按釋名庵園屋也

衆人庵盡圓君庵獨云方君雖樂其中無乃太
異常勸君刈其角使稱箸月牀自然制度穩名
號亦可詳東西南北不足辨左右前後誰能防
願君見聽便如此鼠蝎四面人恐傷

月崑齋又言累石爲山上有一峯穿竅

如月謂之月崑齋

詩中子平
卽子瞻也

月爲太陰精石亦月之類月常寄孕於石中事
理如此何足異天地始分判日月各一物旣名
物乃入形器安有形器不消沒况此日與月曉
夜東西走珠流璧轉無暫停豈與天地同長久
其爲勞苦世共知惟是月有生死時旣然須常
換新者人但不見神所爲日須天上生月必地
中產君不見孺州朱陽縣之山谷間纔成未就
知何限石有不才者徃徃其卵媿靈媿棄置不
復惜任人取去爲珍玩佳者留之待天取藏滿

庫樓千萬許彥瞻博物天下稱更無定不以予
之說爲寢語予恐世人不知嵩丘崑洞中中有
八萬二千修月戶其所食盡玉屑昔有王生
見之滿襍提斤斧應是當年靈鷲山直自天竺
飛落西湖前其上有石姪月月已滿此人竭來
就彼剜剔歸上天所以此石拆編不復合至今
神胞所附之處其痕圓拋擲道傍凡幾歲風刷
雨淋塵土穢子平一見初動心輦致東齊自摩
洗更選他山相擁列就中獨爾一峯最奇絕每

至瑤魄流光下照時玉柱橫歎無少缺子平謂
我同所嗜萬里書之特相寄邀我爲詩我豈能
窓前累日臨空紙遙想崑前寶穴通玉蟾從此
去無蹤請君爲我細書字側名爲月母峯

寄負文饒屯田

英英文饒江漢士何者天教喪眸子用心專一
性轉明無所不知餘兩耳能爲樂府勝張籍暗
誦史書過杜顓弃官新自荆渚歸萬里逆風衝
峽水峩峩全家載巨編坐臥吟詩滿千紙自言

從此生事足可了芋粟及麻枲數椽舊屋菽風
雨一榻蕭然容隱几丘明國語浩如雲子夏門
人紛若蟻向人問口誇舌在道義文章吾豈已
自知俗事無所觀便落雙晴君亦喜

奉送少訥還青神

濕雲堆空洩淫雨日與三嵎氣相軋春陽沈伏
不得動萬木屈蘖草藏茁叢岡複嶺誰敢度且
暮寒鷄叫泥滑少訥胡爲犯此苦特念我困來
省察延之累日對佳話如侍大饗聽控搢彥瞻

第兄別已久使我心胸昏莫刮天將少訥愈我
病次第爲取蹊茅拔長編巨軸寫治亂筆墨揮
灑何橫猾詞章直如子長健辯論不比仲連黠
我慙無琴類師曠鶴誤銜珠投二八酌泉煮蔬
共家饌敢用俗禮費烹殺少訥忽爾道其去歸
轅在途不可握此懷作惡定數日憤憤已覺漸
磨曼欲留少訥意無盡更爲送巡棍西轄

送無演歸成都

曾讀契嵩輔教編浮屠氏有不可忽後於京師

識懷璉彼上人者尤奇偁余嘗從容問其友璉
復爲余道居訥是三大士才過人所畜豈肯吾
儒屈文章汪洋道義富不止區區事其佛余思
此等更誰似蜀有人焉頗超越成都敏行字無
演所謂萬星中一月想嵩璉訥見須避不爾往
往被呵咄通禪曉律兩無碍前會定預耆闍崛
群經列史固汗漫獨泛其深仍出沒外之所精
者書盡不問不語常若吃計其夏臘殊未幾在
大衆中誠窳兀余守陵陽至窮陋雨浸一春泥

汨汨英礫礪礪磴道嶮行客歎歎上齒萃無演
衝冒獨不顧來款余門手持謁呼之使前見已

喜相與圓滿藏神骨

退之送澄觀詩有坐
現神骨空潛然之句清譚

坐久愈飄灑頓遣塵襟落如拂新詩古文覽嘉
貺氣格俊健凌霜鶻觀其袞袞出論議收歛便
可與簪笏試將邀之使從仕笑指此頂安更髮
日招與語自無厭何乃告去苦倉卒西城曉日
照高嶺倒搭乾陀入深樾師歸常宜見嘉祐此
老心中已無物好音相與頻寄惠余在空山正

伊鬱

閻君見示岷山賦因爲小詩謝之

大岷西南鎮崑壑天下秀厥初造此者以作神
仙園相如子雲沒李杜繼其後欲賦俱未敢於
詞怯輕構閻君通方士才力誰可聞驅聯入健
筆萬狀無一漏駸駸語趨勁駿馬雜馳驟太華
楊已拙天台孫亦謬示余讀數過驚聳肩縮脰
勉爲成短章聊酬君意厚

閻生談黃庭

茫茫誦靈文誰爲挾久瞽不能辨三一豈復更
知五方迷得真指忽悟有奇覩自此日相親赤
龍交黑虎

送范堯夫

逖逖走間巷都人起中宵相擁候府門惟恐失
此朝盡言來送公車馬城北橋橋邊脂轄亭大
尹此相邀歌管盛宴集簪裾合群僚四座酒旣
行相顧魂已銷亭前有楊柳秋風減長條折以
持贈公莫賦霜葉凋節物雖謂晚比春情更饒

遞起勸公飲雙呼金翠翹豈徒要公醉恐公遽
乘輶借問何爾爲重公若瓊瑤美質未省變與
人存久要旣莫不可留征衫遂飄飄鳴騶過昇
遷群阘闢如蜩感公來二年免我於無聊今公
舍我去何由借諸朝願君富且貴壽命等松喬
直似先令公巍巍佐唐堯滂淚逐公行不憚公
更遙公誠上下通和如奏笙簫所以得如此人
情不相遼嗟同繆與公一時赴弓招于今二十
年不見有所超前日荷君相與印垂之腰使歸

守山郡藏伏其寂寥聞公將治行乃心日夜搖
恨不能送公俛首類酸瘠徒爲送公詩有如草
蟲啜強勉寫之去憂來立危譙

推官惠李庶子鄂州篆字

天下有奇篆陽水書鄂州異獸呀五口狂咬掉
三頭磔砢玻璃盃詰屈珊瑚鈎愧無希世寶何
以爲子酬

和提刑度支王店鷄詩

王店有郵吏養鷄殊可笑昂然處高襟不肯以

時詔官有宿此者西征待初曉鷄竟不一鳴問
吏吏已告云此寂荒絕左右悉蓬蓼狐狸占爲
宅恣橫不可道前此三四鷄一一遭其暴尋聲
卽知處盡獲爪牙禍自後始得此其若有人教
東方或未明群醜尚騰趨此鷄但鉗結直伺太
陽耀雖然謂失旦似得保身要官曰此何用不
然則宜糶不見不鳴鴈先死蓋自召天下已明
白豈假更喧鬧徒爾費稻梁曾莫知所報吏云
官言是且願勿嘲誚知是本在人此物何足校

送李道士

先生若孤雲兩在隆山見清標瘦彌聳秀骨老
愈健高談吐深詣大句寫精鍊忽起憶鵝池
飛石泉濺

送韓山人

昌黎山人抱藜杖三度訪我於三隅端然入座
更誰顧談辯袞袞如流珠靈丹嘗疑日月鼎至
寶自產乾坤爐要行撒起不可逐安得雙鷓爲
飛鳧

丹淵集卷十終

陳眉公先生訂正丹淵集卷十一

宋

蜀

文

同與可

撰

明

吳

毛

晉子晉

蜀

李應魁務滋同叅

吳

吳一標建先

詩五十四首

二年陵陽不見中秋月

陵陽亂山中陰雲日夕發晴光尚希見况復求
夜月二年逢中秋曾不識皎潔煙雲爾何事常

此作蓬勃纔令薄中明已遣濃處沒群邪利幽
暗左右覺窻窳清光若蒙蔽誰爲我磨拂庭下
倚高株露華霑鬢髮

夜聲

秋風動衰草撼撼響夜月其下有鳴蛩到曉啼
不歇乃知搖落時衆籟自感發安得苦吟人不
能爲一吟

送棋僧惟照

學成九章開方訣誦得一行乘除詩自然天性

曉絕藝可敵國手應吾師
牕前橫榻擁爐處門外大雪壓屋時
獨翻舊局辨錯著冷笑古人心許誰

送喻介夫

介夫陵陽奇男子節義素爲人所談
身長七尺氣萬丈自謂流落誰能甘
去將舊學中新格坐抑高第如手探
明年西歸有光耀且請爲我來山南

飛泉山寺

東城兀高峰爽氣浮翠微霞光射巖壁中有寒
泉飛上方金僊家煌煌啓雙扉攔干出雲表目
可了四圍我來久不下幙影移斜暉風吹月中
桂天香滿人衣遠渚鳧鴈落前嶺牛羊歸尚此
戀幽勝不能手聊揮

山雨

山雨灑春城淅淅聲頗急牕下讀書人橫編揭
陰濕高鳶餓獨叫遠燕寒雙入南園有桃李盡
抱群梢泣

送牟太素山人

山人高迹若孤雲，聊問太虛求所止。
昨因隨風起西北，翩然遠墮三隅裏。
攬之不住，瞥爾去。瞬息誰知幾千里。
東遊必定遇鴻濛，請問無爲寂
深旨。

送龐中秀才

曼倩學精知蜥蜴，公明術妙識蜘蛛。
臨卽復有龐成叔，萬事先將入卦圖。

遣興効樂天

君莫學楊虞卿奉李宗閔宗閔權勢豈能久君
莫學劉栖楚附李逢吉逢吉祿位寧長守雖然
一時身暫好其奈千古名常醜丈夫讀書要知
道所信不篤被其誘大張富貴作羅網愚者紛
紛以身就左纏右繞不可脫誅竄還當逐其後
君不見虞卿須遇李固言君不見栖楚終遭韋
處厚一朝摧折靈氣盡龍如蛇兮虎如狗勸君
聖賢術內好潛心勸君邪佞黨中休入手豈不
知潞州處士田佐時喚與美官嫌不受

遣興三首

惻惻抱伊鬱試此登嶠堯陰風吹繁雲黯黯蒙
秦霄關河眇無際節物何蕭蕭過鴈安所之驚
哀翻沈寥幽懷漭如失隨此群草凋嗟予生胡
爲迹玷明盛朝服職詎云補赧然綴群寮感此
四序遷一昏復一朝寒霜入兩鬢漸積不肯消
良辰乖所遇慨嘆心魂飄賤稟迂且介於時信
無庸欲適闕所之此道當何從富貴諒非有僻
陋知可容豈不媿上恩耗此釜與鍾昨歸得此

州溝眼皆亂峯事物固瑣碎敢茲任頑慵報國
祇自明惟神諫其胸

其二

少小事編簡淵源極沿洄不自測其深津涯信
悠哉旣長務修省日以德義培一匱敢中晝期
之至崔嵬振纓仕明庭鴛鴦忝遊陪蹇修無嗣
者誰可吾與媒吐艷落晚春薦然抱枯荻因人
寔自耻寂寞余敢哀何當清冷泉襟裾濯氛埃
故山有松菊待賦歸去來

其三

連陰不肯解山霧嘗霏霏積潤日已滋厭浥沾
人衣展轉厭早起隔牕問晴暉幸聞太陽出身
體輕欲飛

中秋夜坐遣興

素紈不搥風滿襟露氣中夜寒相侵予懷浩然
杳莫寄伴月直到青天心

臨闌閣

絕壑迎朱檻高林拂畫楹卷簾千嶂遠入座一

川平蜺綵緣雲斷霞光射水明不須誇曠望爲
語謝宣城

野逕

山圍饒秋色林亭近晚晴禽蟲依月令藥草帶
人名排石鋪衣坐看雲緩帶行官閑惟此樂與
世欲無營

寒螿

山月滿地流金波寒螿向秋鳴更多大都特節
使如此止爾不得將柰何

辛亥孟秋戊子有虹下天繞飛泉山入

東谷飲古井良久去作大雨咄之以詩

長虹落天帔萬丈截群嶺蟠身下深谷頻首飲
古井居人莫之指况復敢引領愔然繞空去雲
霧變俄頃乾坤爲之黑噴雨極暴猛崩流匯溝
瀾巨漲沒四境民田一漂蕩多稼不可省此物
蓋蟲類聞亦具頭頸淫沴之所生詩傳載爲青
朝西暮東出輒與日對影夫何此凶孽得使乘
時逞高風掃寥廓一帚昏穢淨煌煌太陽起隙

穴被光景群陰逐海內此物應遠屏

寄何首烏丸與友人

此草有奇効嘗聞於習之陵陽亦舊產其地尤
所宜翠蔓走崑壁芳叢蔚參差下有根如拳赤
白相雄雌斲之高秋後氣味乃不虧斲以苦竹
刀蒸曝凡九爲夾羅下香屑石密相和治入曰
杵萬過盈盤走纍纍日進豈厭屢初若無所滋
漸久覺膚革鮮潤如凝脂旣已鬚髮換白者無
一絲耳目固聰明步履欲走馳十年親友別忽

見皆生疑問胡得爾術容貌曾莫衰爲之講靈
苗不爲世俗知蓋以多見賤蓬藿同一虧君如
聽予服此語不敢欺勿信柳子厚但誇仙靈脾
霜栢亭試墨

山風吹早晴袂服覺微凜煙雲有佳尚竹石得
幽稟閑牕覆舊局晚閣試新品幾欲賦郊居奇
詞未如沈

閱史感事

世間諸味已全疎惟愛縑緗似蠹魚名霸者來

爲御史姓關人去作尚書晉師嘿嘿曾何害楚
客昂昂只自如安得漢陰歸抱甕滿園青甲灌
新蔬

富春山人爲予道其所獲石於江中者
狀甚恠偉欲予作詩言若可得持歸刻
其上當相與傳無窮余夜坐平雲閣是
時山月清凜啼蟲正苦余因此景物索
筆硯爲山人賦之

奇礪噴岼倚秋江俗眼過幾多所忽風霜鍛鍊

愈堅重怒浪噴激不可沒富春山人好尚古見
此便以作吾物鑄鏡牽挽置庭下犀角鯨牙蛟
蜃骨精金疑滑露筋脊老玉礪砢開竅窟狂螭
奔拏勢天矯猛兇搏王氣蓬勃山人誇我謂如
此欲我詩之慙拙訥何當走到山人家撫月摩
煙觀突兀

平雲閣偶作

陵陽郡事全稀少嬾守長羸半日閑晚後須來

上高閣就中無厭是雲山

聞陳山人定命丹成試以詩乞

水火相交養大還已聞神汞滿爐乾
彘肪穀漆尋常得敢服靈丹二萬丸

厭蟲

月出松塢明露下蓮塘清今宵好風色獨遶林
下行百蟲爾胡爲嘖嘖饒秋聲求靜不能得我
詩何由成

新晴山月

高松漏疎月落影如畫地徘徊愛其下及久不

能寐怯風池荷卷病兩山果墜誰伴予苦吟滿
林啼絡緯

送堯夫二章

有志深沉定無心出處同廟堂應爲國臺省復
還公肖似家聲重端方士論雄上如留左右風
采壯朝中

其二

欲與民爲利先求正所妨紛更初下議旁午遂
交章不爾毛安傳其如體自傷西南餘弊在歸

爲對明光

秋日田家

淘漉溝源築野塘滿坡煙草臥牛羊今年且喜
輸官辦豆夾繁多粟穗長

二色芙蓉

已下五首和
吳龍圖韻

蜀國芙蓉名二色重陽前後始盈枝畫調粉筆
分粧處繡引紅針間刺時落晚自憐窺露沼忍
寒誰念倚霜籬主人日有西園客得爾方於勸
酒宜

洗竹

斤斧從來到此稀爲撩疎密遶藩籬已繁不用
饒新筍縱礙何妨惜舊枝風外清音聞曲閣月
中寒影下方池想公日在琅玕逕正是棠陰訟
少時

琅玕逕在西園竹逕名也

明堂肆赦不得預觀感而成詩

季秋陽館事嚴裡能饗洪惟上至仁游廟衣冠
參帝坐侍祠簪佩儼星辰歡聲被寓和於律協
氣流天藹若春卽見陪鑾千萬祀豈長如此在

遐垠

經史閣

自持金節此爲州小善何嘗不見收更起麗譙
連石室盛藏縑帙擬蓬丘師延舊德皆高誼士
集他邦盡久留當念河南嚮儒意莫教弦誦少
時休

有懷致政景仁侍郎

一生名籍占風流爲識莊環可自由几杖未銷
容早退廟堂將近肯中休有人把酒思高節何

處揮毫詠素秋故國岷峩最佳絕幾時歸伴赤
松游

吳公惠酒因謝

山城物色正嚴冬梅放長梢露小紅破萼未深
聊敵雪收香不密任隨風儘教插滿金釵上休
管吹殘玉笛中須至開筵召佳客爲公連夜賞
鄂筒

登陵陽雲山閣寄上吳尹

雲山高閣倚危墻晚意無窮在渺茫極望不知

雲幾許滿空惟見鴈交相與誰把酒邀明月獨
自吟詩到夕陽因念平臺有佳興鄒生枚叟奉
梁王

和寄白聖均

年來雙鬢已絲絲頭角佢摧羽翼垂無命不窮
常自笑有謀皆拙敢求知榮途謾說居三館僻
郡還其守一麾賴是山城好風物不能逢子共
吟詩

和提刑郎中閱兵之什

曉營金革列周遭大纛長牙擁帳高虎豹用韜
傳妙略龍蛇供陣役群豪言初撫處如蕭續恩
盡均時若楚醪敢謂施行剪諸盜亡之纔比一
牛毛

晚坐山亭口占

嶺上生來月似磨崑前斷去雲如削遙聞褐吏
叩高林應是雷公催采藥

送王晦叔

豈無舊德爲清望亦有疆親在要流班簿至今

纔博士郡書猶自許諸侯貧甘遠宦冰盈腹老
憶高堂雪滿頭不恃交期便求去趨歸春圃奉
蘭羞

重送

一生自守至如此惟道外皆非所親顧已通塞
盡有命是身可忍求人

又六言

鷺尾歸艤正穩鴨頭春水方深不得同搖楚掉
與君齊到山陰

登山亭

登臨平楚外徙倚夕陽間歸鳥亂飛葉暮雲凝
遠山行知筋力倦愁欲鬢毛斑坐久成搔首疎
慵好強顏

文領相仍意慮煩濁聊携野策獨訪山
園因覩霜栢亭殘梅憶公向時有詩酒
之惠感物成詩繕寫拜呈知府龍圖諫

議吳公

昨日梅開飲公酒今朝梅謝念公詩眼前光景

急如水案上簿書焚若絲且試輟忙來此地可
憐遺恨滿殘枝西園想已成青實敢問調羹去
幾時

依韻和張推官元夕

山郡上元榮樂事大開金地作遨場煙雲向曉
誰教霽燈燭乘春自有香紫陌熒煌隨步遠綵
棚佳麗闔眉長遊人莫惜酬高直買取銀蟾一
寸光

小閣戲書

閑揭新刊集時裝麝膏香還如到茂灌無物在
牀旁

伐枯株

層崖垂空石壁牢上有大木百丈高古荔全身
裹鐵甲頑薑滿腹鋪金毛空根老蟒露擁腫曲
拚恠鴝爭呼嗥一朝壯士揮巨斧無限隨死蓬
與蒿

可笑口號

七章

可笑庭前小兒女栽盆貯水種浮萍不知何處

聞人說一夜一根生七莖

其二

可笑陵陽太守家閑無一事只栽花已開漸落
并纔發長作亭中五色霞

其三

可笑此公何太惑讀書寫字到三更也知學得
終無用自肯辛勤比後生

其四

可笑生平事迂闊向人不肯強云云到頭官職

難遷轉一似城南蕭次君

其五

可笑爲官太徼幸養愚藏拙在深山君看處置
繁難者日夜經營心不閑

其六

可笑兒孫亦滿眼朝朝庭下立參差謂言飽讀
詩書去憔悴如翁亦好爲

其七

可笑山州爲刺史寂寥都不似川城若無書籍

燕圖畫便不教人白髮生

近日

近日簿書全簡少吏人惟趨兩衙休歸來便只
尋冠屨遶遍林亭山上頭

舟淵集卷十一終

陳眉公先生訂正丹淵集卷十二

宋 蜀文 同與可 撰

明 吳毛 晉子晉

蜀 李應魁 務滋 同叅

吳 吳一標 建先

詩五十首

送知府吳龍圖

國初已來治蜀者處置盡自乖崖公當時奏使
便宜敕不與天下州府同行之已及八十載姦

究消伏誰之功因循至此漸抗救有未曉者時
相攻鞭管小罪亦檢察不許略出常科中下民
知之頗不懼州縣往往藏群兇側身斂足未動
者實以累朝恩澤隆公之初來蜀人喜慈愛舊
熟民情通衆心歡然恥犯法採藥浮薄歸醇醲
盡將約束付僚吏興起學校還文翁二年美化
極沾洽遠近循服如偃風上將歸公問誰代當
使間作如笙鏞遂求元老得青社其人廊廟之
宗工往年鎮撫有異績大旆再遣來於東公今

與之合符去到必奉詔參夔龍大資舊德固無
慮剖判自出其心胸所憂厥後嗣之者忠定良
法還如空養頑活狡作淵藪不免剪殄煩興戎
同之憤薄又填臆言賤不得通九重願公上殿
起居罷第一用此聞宸聰

送通判喻郎中

前年爲郡得陵時不請其州陋如此蕭條官宇
崑嶺上零落民家坑谷裏西城初入已可厭竊
謂豈堪余所止幸逢之彥倅郡事日月漸深殊

可喜予之所稟至迂謬君亦恬然尤自委每來
聚議一朝罷各去掩門歸隱几雖然有時亦爲
會此事可知誰得已酒肴麤糲妓樂可况復饒
饒滿公使惟於試茶并看畫以此過從不知幾
幕中有客乃佳士愛遣高談聽疊疊如斯共處
五百日索寞情懷未嘗起君今官滿忽先去撩
動予愁安可捉英溪長亭一揮手自此吳蜀五
千里謂言川江會北固中亦有船多上水願君
因出到金山遇此莫忘批紙尾

送通判喻郎中 二首

晴霞照西城漠漠卷宿霧高空綠危磴此乃君
去路吳蜀向萬里上馬初一步莫言道途遠况
已嗟久寓今茲有行色便可到北固長亭聊把
手幾日更逢遇不敢醉君酒君意實急遽惟是
送君心相隨亦東驚

其二

群居五百日日如初見一日忽遠別能不成
愴戀人生三萬日光景若激箭何若於其間喜

溫費顏面茲緣勝心在胸內每交戰既欲多上人計校須自銜於事固無補在已亦非便仕路繁此徒可謂丈夫賤愛君性渾厚殊不與時變相共爲此州敢說皆盡善何嘗分彼此惟務乃職辦所以將二年無有長短辦爲人倘如此所至復何患官滿去還臺豈能忘眷眷陽關調雖苦且盡西城宴問君到京國幾月方下汴予亦想是時移守至梁甸佳音幸見及西南足郵傳

山城秋日野望感事書懷詩五章呈吳

龍圖

原隰蕭條草木衰倚風渾類楚人悲便成孤憤
終何事且寄遙懷對此時千里暝陰雲杳靄一
川寒影鴈參差登臨自不宜羈旅更敢憑高賸
作詩

其二

已是秋陰更夕曛亂山高下起寒雲危樓願見
客何處遠笛不知人厭聞身外流年波渺渺眼
前生事菜紛紛此愁萬斛誰量得直爲重捻庾

信文

其三

才力雖難敵楚騷賦詩常亦在秋多自然野思
元無限不爾閑愁可柰何要路故人皆廢忘偏
州佳客少經過明時且爲貪榮祿豈學湘纍便
九歌

其四

崑谷雨餘生晚煙高城危閣坐蕭然側身仕路
本誰使回首家山空自憐遠信斷來從過鴈苦

吟多後敵鳴蟬郡齋有客唯莊叟常與高譚內
外篇

其五

早是蓬山預校讎起居常赴殿東頭
鷓鴣擁陛聯簪笏日月開天拜冕旒
一出光陰銷遠郡兩形篇什詠清秋
有人更在楊莊上文似相如肯見休

東丘老人

東丘老人眉有毫皮肉光潤牙齒牢
自云新年

九十九鬚髮白者無一毛問之吾術本無有嚙
津納息徒嘈嘈莫將元氣佐喜怒自然所得春
秋高吾嘗行之五十載此事至易曾不勞飲之
以酒謝使去手足輕利如猿猴嘗聞唐人柳公
度八十許歲精力豪其言與人亦如此老人無
乃斯人曹

送堅甫同年

五首

堅甫神太清不謂久流落別來二十載論議轉
深博其中富所有種道以文獲鋪張講治亂破

若勁弩橫衆人誚青衫可笑俗眼薄蘭筋隱瘦
骨墜耳受羈絡拳攣喙拄地過者無伯樂去蜀
持底歸雄藁滿壞橐朝辭玉壘關暮上石櫃閣
知子者云誰獨我懷抱惡

其二

得數常奇懶下籌肯來荒徼治纍囚三年笑別
浙江遠萬里吟歸岷嶺秋趙壹囊空常飢饉虞
卿書就愈窮愁距香回臭都休問未有林泉且
宦游

其三

春深行劔棧羨子此時歸照日江浮馬迎風花
聚衣下程家累省對景俗題稀若遇西來客書
言不可違

其四

春風吹雪滿西窓此夜無人對酒釭若到杭州
見蘇子爲言常夢過松江

其五

華亭有珍禽毛豐而骨細他日上隋渠爲我致

清唳

送李道士歸

先生狀貌古瘦健若老鶴
秋風唳清霄寒響滿
寥廓一腹冰雪詞勿爲俗人作
便可住鵝池乾
死守崑壑

師厚還朝

聞公之名三十年常恨與公不相值
豈期今乃
出門下每一見公心自醉
詞章豪蕩已難敵
辨
論注射尤可畏
諮詢故事要蔣又講正大體須

賈誼荆山拾玉抵乾鵠虞坂裝鹽豎良驥用人
最忌非所宜願莫使公嗟俗吏

牽牛織女

桂陽有仙人姓名武丁胡爲墮人世
人惟識其形一日語其弟吾將返青冥
乃曰此七夕上天呼群靈織女欲渡河
暫詣牽牛星諸仙盡還宮天路羅雲
駟吾亦向祈召當往不得停弟問何時
還答云三千齡明日失丁在恍惚迷所
經後世凡此節兒女喧家庭縱橫具織
鏤花菓排

甘馨貪巧但云得欲寐曾莫寧俗尚每恠長吾
言誰見聽

金鳳花

花有金鳳爲小叢秋色已深方盛發英英秀質
實具體文采爛然無少缺纖空翩翩翠影動紅
白紛亂如點纈誰云脆弱易飄墮自邛至翼亦
數月美人形相欲摹畫巧不得施暫自拙鋪茸
剪綵轉難似只把長條恣穿結眼前草木盡零
落憐爾開於此時節常如小兒花性命所

繫不忍折君不見昨夜雨今朝風一隊鷺飛返
丹穴

亭前高栢

石田磽磽地力燥誰種雙栢已高大長材天矯
堪巨棟老頂縈紆若層蓋雪下孔翠寒不起風
中笙篳清可愛菟絲幸好求女蘿莫倚纖柔欲
無賴

凌霄附栢

古栢蒼蒼高入雲凌霄萬朶擁其身有如巨君

染須髮新娶杜陵佳麗人

謝黃森惠詩并草書

黃蘭溪

南蕲黃夫子生平氣凜然吟詩舊有癖寫字近
方顛可惜空山老須爲後世傳蘭溪修禊否願
續永和年

東齋悶書

讀書已無効何用轉勞苦閑齋幸無事日共古
人語古人議論好善惡皆有補舍此欲奚爲惟

應睡滿午

寒食感事呈同官

三月八日值寒食陰霾蔽空不肯收北園花木
殊未動到處哭雨惟鳴鳩吾曹可憐愛薄宦耳
此寂寞來山州酒有有無更莫問逢遇相與清
談休

借杏

北園山杏皆高株新枝放花如點酥早來其間
有啼鳥兒女盡識名提壺急教取酒對之飲滿
頭亂插紅模糊可憐後日再來此定見隨風如

錦鋪

讀蔣都官畫像記

蔣爲永康軍判官
甲午之亂死於賊

聞昔妖氛滿巴蜀所臨州縣偃如風其城陷者
盡從賊以義死之惟有公節與岷山高莫敵名
隨阜水注無窮蘭臺秉筆今誰氏舍此何由壯
史功

題黎公照序訓堂

常愛三峨臨古郡君之別業在其城近營大第
當高處更起新堂立美名滿外江山皆秀絕入

中文史自縱橫如何置得烏尤住相與談經過
此生

朝陽亭

峩峩乎守居已與前峯對朝陽乃危榭更在守
居外煙雲一川滿林麓三山會近檻有胡牀無
忘傲公退

觀風閣

危閣覆高林晚步聊徙倚東南兩峰斷空闊見
萬里茫茫落霞外冉冉孤煙裏忽暗識歸雲乍

明知積水風從半天下月向平地起夜久殊未
還峩冠露盈几

山池

偏側蒼苔地低邪白石池數枝紅齒菖幾尺碧
漣漪魚鯿爭香餌兒童簇釣絲愛來芳蔭下每
日日西時

憶西湖舊遊

西湖晴碧晚溶溶與客常來坐好風記得有人
歌小玉月明猶在畫船中

再送師厚

久使西南此召還鹿頭東去漸雲山莫嫌策馬
經燒棧正好題詩到散關財利文書猶絡繹邊
防田地已朱殷奇謀不吐將何用况是歸臨咫
尺顏

平雲閣觀雨

黑雲滌天雷破地風卷雷射雨傾瀉噴崖倒壑
恣頽蕩咫尺不可辨牛馬鷄豚已見逐高浪禾
稻應須沒平野莫言魚鼈走堂厨且看泥沙漫

屋瓦

不雨

陵陽官居遇久旱發喘渾如起新病已驚赤日
晨可畏更恨炎風午尤盛徒嗟禾黍盡焦落無
柰蠅蚋轉豪橫安得神龍駕九霄大霖滿傾如
倒井

久雨

寒鳩劬劬屋上鳴欲使此雨何時晴山中有客
抱幽鬱日日起望東方明今朝晚霞發光焰喜

極再拜當西楹須臾雲陰又蒙沒遣我涕淚流
沾纓

山園

久雨無所適新晴步山園西風滿高林敗葉驚
已翻時節急如此世事安可論夜歸燈下吟寒
蟲伴幽喧

石泉

儼儼聳石壁拆穴中流泉斷崖散激激曲竇藏
涓涓蓄潤活古辭烝虛發晴煙時懷一勺惠使

我心泠然

里賦

史少訥見許江豚未得以詩戲

霜重水落岸有冰江豚乘寒弄晴日搖波拍浪
乍群起尾厚喙長鬣鬣赤魚人清曉橫巨舟一
舉大網凡數頭想君盤飭已厭足何不略遣來
陵州

北園梨花

寒食北園春已深梨花滿枝雪圍遍青春每向
風外得秀艷應難月中見苦嫌桃李共妖冶多

謝松篁相惹蒨黃鸝紫燕莫過從時有一聲拖
白練

華山二首

崑頭漠漠衛卿雲谷口紛紛張措霧安得鉤梯
上石龜欲看明星洗頭處

其二

石蓮峩峩橫紫霄中瀉萬丈銀河水安得大箭
長八尺欲與天神博於此

黃崖洞

黃崖大洞埋古雲入去所履平如席其中玉髓
盡可食只恐歸來變爲石

師魯推官惠甘蔗戲謝

滿節甘滋滲齒寒醜醜誰與釀琅玕不知佳景
何時入試似前人取倒飡

寄呈溫江安寺丞

高崖古驛荒涼甚過客何嘗住久之獨有門邊
君寫處每來無不讀多時

朝任昉

幸自文章亦可憐，不消一事已爲賢。何如却逐
蚩兒去，忍恥更來王亮前。

袁術

四代司空倚世勞，可嗟不肖事姦豪。妾云名字
與讖合，直欲起應當塗高。

偶成

僻陋爲州恥不才，偃然空見兩星回。祇應歸舉
謠言日，三府諸君口盡枚。

卽事

公禮欲下格具觀人所存須知范孟博豈肯伏
陳蕃

薄命女

天天東鄰妹艷色如春柔去嫁不得偶羅衣空
自羞輕埃掩菱花不分鉛華休回首視庸奴寂
寞還卷收

子平寄惠希夷陳先生服唐福山藥方
因戲作雜言謝之

蜀江之東山色盡如赭有道人云此是丹砂伏

其下煙雲光潤若洗濯澗谷玲瓏如刻畫我聞
神仙草藥不在凡土生是中當有靈苗異卉之
根莖果然人言所出山芋爲第一西南諸郡有
者皆虛名就中唐福衆稱賞肥實其香天所養
有時崑頭倒垂三尺壯士臂忽然洞口直舉一
合仙人掌土人入冬農事閑千篝萬鋪來此山
可憐所鬻不甚貴着價卽售曾不慳往年子瞻
爲余說言君所部之內此物尤奇絕後復寄書
勸我當餌之滿紙親題華嶽先生訣予因購之

不惜錢依方服餌將二年其功神聖久乃覺筋
牢體溢支節堅自問丹霄幾時上早生兩翅教
高颺塵世如帑不可居待看鴻濛對雲將

